

**Siunnersuut: Suaassuseqatiminnik atoqateqartartut allatulli
meeravissartaarsinnaalernissaat siunertaralugu aappariittut nalunaarsorneqartarneq
pillugu inatsisip allanngortinnissaa siunertaralugu danskit naalagaaffiannut
Naalakkersuisut saaffiginnequllugit, peqquneqarnissaannik Inatsisartut
aalajangiiffigisassaattut siunnersuut.**

(Inatsisartuni ilaasortat Naaja Nathanielsen, Inuit Ataqatigiit aamma Justus Hansen, Demokraatit)

Akissuteqaat, siullermeerneqarnera
(Naalakkersuisut Siulittaasuut)

1. Siullermeerneqarnera

Naalakkersuisut Siulittaasuata aallaqqaasiutitut siunnersuut pillugu qujassuteqarusuppoq.

1996-imi Kalaallit Nunaanni aappariittut nalunaarsorneqartarneq periarfissaqalerpoq. Aappariittut nalunaarsorneqartut aappariit allat assigalugit pisinnaatitaaffeqalerput. Ataasiakkaanilli ilanngussaqaanngitsoortoqarpoq. Aappariittut nalunaarsorsimasut suaassuseqatiginngisaminnik aappaqartutut meeravissartaarsinnaalernissaminnik periarfissinneqaanngillat.

2009-mili aappariittut nalunaarsorsimasut aappamik meeraannik meeravissartaarsinnaanngorput, tamannali aatsaat pisinnaalluni meeravissartaarinierneqartoq nunamit allameersuunngippat.

Naalakkersuisut siunnersuuteqartoq isumaqatigaat, suaassuseqatiminnik atoqateqartartut suaassuseqatiginngisaminnik atoqateqartartutulli meeqqanik toqqissisimasumik pitsaasumillu peroriartortitsisinnaanerarmagit.

Siusinnerusukkut eqqartorneqareersimavoq, aappariittut nalunaarsorneqarsimasut meeravissartaarnissaannut akuersissuteqartarnerup nunanit allanit meeravissartaarniarnermi ajornartorsiutaasarnera. 2003-mili Europami nunat arlallit, taakkununga ilaatigut ilaallutik Sverige, Island aamma Tuluut Nunaat, aappariittut nalunaarsorsimasut nunanit allanit meeravissartaarsinnaanerannik akuersissuteqartalerput. Danmarkimi inatsimmik allanngortitsinermut atatillugu nunani taakkunani oqartussat ilisimatitsissutigaa, nunamut pineqartumut aappariittut nalunaarsuisarneq meeravissartaartitsisarnermi ajoqutaasimanngitsoq. Nunanit allanit meeravissartaarniartunut piunasaqaateqartarnikkut meeravissartaartarneq pisarpoq. Nunat taakkua taamaasillutik aappariittut nalunaarsorsimasunut, kisermaanut, avinnikunut il. il. meeravissartaarnissaq itigartitsissutigisinnaavaat. Killilersuinerit taamatut ittut aappariit suaassuseqatiginngisaminnik aappallit kalluanngilaat. Siusinnerusukkut tamanna ajornartorsiutaasimasooq ajornartorsiutaajunnaarsimasutut isigineqartariaqarpoq.

Kalaallit Nunaat nunarsuarmi suaassuseqatiminnik atoqateqartartut suaassuseqatiginngisaminnik atoqateqartartunut naleqqiullugit pisinnaatitaaffiisa tungaasigut siuarsimasorujussuuvoq. Tamanna tulluusimaarutissaraarput. Taamaamat Naalakkersuisut nuannaarutigalugu siunnersuutigineqartoq tapersorsorpaat, taamaaliornikkut suaassuseqatiginngisaminnik atoqateqartartut ullumikkuminngaanniit inatsisitigut

pitsaannerusumik inissimalernissaat aammalu suaassuseqatiginngisamik atoqateqartartut pisinnaatitaaffigisaasa assinginik pisinnaatitaaffeqalernissaat qulakkeerneqassammat.

Aappariittut nalunaarsorsimasut pillugit inatsit Kunngip peqqussutaatigut Kalaallit Nunaannut atortuulersinneqarsimavoq. Appariittut nalunaarsorsimasut meeravissiarthaarnissaannut akuersissutip allangortinneqarnissaa peqqussutip taassuma allangortinneqarnissaanik piumasaqaatitaqarpoq. Aappariittut nalunaarsorsimasut pillugit inatsit toqqaannartumik allangortinneqarsinnaanngilaq. Taamatut allannguinnikkut Naalakkersuisut tapersorpaat, aappariittut nalunaarsorneqartarneq pillugu Kunngip peqqussutaata allangortinneqarnissaa pillugu danskit naalakkersuisuinut saaffiginnittoqassasoq.